

Cannabis ta malo pa hobennan y muchanan



DIALUNA durante e conferencia di prensa semanal di Partido RED, Rudy Lampe a presenta dos di e escritornan di The Pot Book. Esaki ta un buki cu ta papia di e diferente aspectonan di e uzo di cannabis y e influencia cu esaki por tin riba diferente tereno manera e.o. Medicina, Politica, Ciencia y Cultura.

Mirando cu Rudy Lampe tin simannan ta trata na haci e comunidad di Aruba consciente di e beneficionan di marihuana a puntr'e cu si e ta kere cu e cultura di e isla ta cla pa e introduccion aki. Segun Rudy Lampe, cultura no ta algo cu ta keda pa semper un caminda. Como ehempel el a duna e papel di hende muher riba un isla chikito manera Aruba con el a cambia drasticamente e ultimo añanan. Si den pasado hende muher no tabata traha y mester a keda cas cu e yiunan, por mira cu awendia hende muher ta forma gran parti di e forza laboral riba Aruba.

Cultura ta cambia y semper mester cuminsa un caminda. Pa 50 aña a brainwash hende cu cannabis ta algo malo y pues dimes lo tuma tempo pa saca e ideanan y mentiranan cu a wordo hinca den nos cabez. Lampe a splica cu e lo sigui trece testimonionan dilanti di hendenan cu a experiencia marihuana positivamente. Cannabis ta un mata maravioso cu potencialnan curativo grandi. Cigaria y alcohol ta forma parti di nos cultura mientras cu nan si ta ocasiona daño na nos comunidad, manera acciden-tenan pa motibo di abuso di alcohol. Rudy Lampe ta kere cu unabes hendenan wak e beneficio di e mata aki, nan lo escohe p'e. Ta

receta y bebe Paracetamol pa loco riba nos isla mientras cu e si ta malo pa nos salud y Cannabis cu ta un remedi, nos tin miedo di uz'e. P'esey unabes e beneficianan bin nos dilanti, Rudy Lampe ta kere cu e hendenan lo realisa cu nos a wordo indoctrina pa hopi aña.

Banda di testimonionan positivo a puntra Rudy Lampe si lo bin cu campañanan di conscientisacion di Cannabis. Lampe ta kere cu e echo cu ya ta papiando riba Cannabis, esaki ta algo positivo paso e ta crea discucionnan. Ta importante pa enfatisa cu Marihuana no ta bon pa hobennan y teeneagernan ya cu nan cerebro no ta cla pa esaki ainda y p'esey legalisando e uzo di Cannabis por tin un miho control riba e uzo. Si cuminsa papia riba esaki por duna hobennan un bon splicacion pakico lo ta bon pa warda te ora cu nan ta responsabel suficiente pa tuma desicionnan asina. Cifranan ta musta cu den paisnan cu Cannabis ta legalisa of sikiera tolera, e uzo bou di hobennan ta mucho mas abou cu den paisnan unda cu e ta prohibi. Legalisando e ta kita e kick di hobennan cu gusta haci cosnan prohibit. No tin nada malo si un hende kier sali di stress door di uza Cannabis y un opcion menos dañino pa nos salud ta keda e mata medicinal aki. Rudy Lampe ta kere cu papiando riba dje ta un bon comienso.

Pa tur esnan cu kier sa mas di e topico aki, diamars y diaranson lo tin dos charla den e edificio di ATIA. Julie Holland y Jeremy Wolff lo ta e oradornan principal y lo tin oportunidad extenso pa haci pregunta. Entrada ta solamente 50 florin pa anochi.